



Adriatic Metals

Eastern Mining

ODRŽANA DRUGA SJEDNICA ODBORA ZA ODNOSE SA LOKALNOM ZAJEDNICOM

U sali općine Vareš, 16.02.2023. godine, kompanija Eastern Mining je održala drugu po redu sjednicu Odbora za odnose sa lokalnom zajednicom u novom sazivu. Sjednica je započela usvajanjem Zapisnika i Zaključka sa prethodne tj. prve (I) sjednice PLC-a. Druga stavka dnevnog reda bila je prezentacija članova kompanije Eastern Mining o prethodnim aktivnostima i predstavljanje planiranih aktivnosti za naredni period.

Na ovoj sjednici članovi Odbora za odnose sa lokalnom zajednicom imali su priliku da se upoznaju sa novim rukovodstvom kompanije Eastern Mining Matthew Hine, generalnim menadžerom i Alemom Logom, izvršnim direktorom. Oni su se zahvalili svim članovima na dolasku i istakli nadu za uspješnu suradnju u budućim aktivnostima koje dolaze.



KAMPANJA ZAPOŠLJAVANJA U KOMPANIJI EASTERN MINING



U mjesecu martu, Odjel za ljudske resurse kompanije Eastern Mining je organizovao kampanju zapošljavanja za 180 novih radnih mjesta. Kako je projekat u fazi izgradnje, koja uključuje izgradnju transportnog puta, postrojenja za preradu, te otvaranja rudnika na Rupicama, javila se potreba za većim brojem radne snage. Iako kompanija trenutno broji 184 radnika, u narednih 6 mjeseci se planira zaposliti dodatnih 180 radnika na različitim pozicijama. Kako bi se građanima pobliže predstavio plan zapošljavanja, predstavnici Odjela za ljudske resurse su putem radio Bobovca informisali lokalnu zajednicu o kampanji te su do kraja marta bili na raspolaganju svim zainteresovanim u Informativnom centru u Varešu, gdje su svi mogli da se detaljno informišu i prijave za posao. Pored Vareša, kampanja je obuhvatila i općinu Kakanj. Kompanija Eastern Mining želi da podstakne razvoj općine Vareš i susjednih općina, a zapošljavanje je jedan od najboljih načina doprinosa boljoj privredi i kvaliteti života jedne lokalne zajednice.

BAZAR „RUKAMA ŽENE“

U utorak, 07.03.2023. godine na platou gradske pijace Udruženje žena za ruralni razvoj, održivi povratak, reintegraciju i resocijalizaciju povratnika "Zvijezda" Vareš organiziralo je bazar pod nazivom "Rukama žene". Cilj ovog bazara je okupljanje lokalnih udruženja žena i samostalnih izlagača koji se bave različitim izradama ukrasnih predmeta, nakita, eteričnih ulja te domaćih proizvoda koji mogu poslužiti i kao pokloni.

Bazar "Rukama Žene" organiziran je pred obilježavanje Međunarodnog Dana žena, kako bi se na taj način okupila aktivna udruženja žena i žene sa područja Općine Vareš koje se bave određenim malim biznisima. Na bazaru je učestvovalo pet udruženja i 13 samostalnih izlagača.

Kompanija Eastern Mining, kao sponzor ovog događaja, je ponosna što je dio ove priče, te se raduje daljnjoj suradnji i nuda se kako će ovaj događaj postati tradicija. Kompanija podržava pozitivne promjene i aktivizme lokalne zajednice, a naročito vulnerable skupine kao što su udruženja žena koja su aktivna u svom radu i koje ponosno predstavljaju kulturu i tradiciju općine Vareš.



INTERVJU SA AIDOM IMAMAGIĆ

Prije svega da Vas pozdravim i zahvalim što ste pristali na intervju u sklopu projekta „Living History Project“ kompanije Eastern Mining. Za početak recite nam nešto više o sebi.

Dobar Vam dan i hvala na pozivu. Sretna sam što imam priliku biti dio Vašeg projekta ispred Mješovite srednje škole "Nordbat-2" Vareš gdje obavljam funkciju sekretara. Moje ime je Aida Imamagić i završila sam srednju rudarsko-tehničku školu. U tadašnje vrijeme praktična nastava srednje rudarsko - tehničke škole održavala se na površinskom kopu Smreci. Krajem mog srednjoškolskog obrazovanja rudarstvo se počelo polako gasiti tako da sam nastavila školovanje i magistrirala pravo. Moje radno iskustvo od 26 godina provedeno je u školi sa mладима što čini ljepotu mog posla.

Možete li napraviti poređenje života kako je bilo prije, a kako danas u Varešu?

Vareš je specifičan gradić koji ima dušu i to je nešto nepromjenjivo. Nekadašnja vareška privreda i rudnici su bili primamljivi za dolazak mnogo ljudi do samih ratnih dešavanja. Moje mišljenje je da će se Vareš kroz dvadesetak godina vratiti u stanje u kakvom je nekada bio. Vjerujem da će otvaranje Vašeg rudnika podstaknuti ljude na dolazak ili povratak te trajno zadržavanje u Varešu. Zahvaljujući nama Varešanima koji smo ostali tu da živimo, ponovo se vraća duh Vareša, ta kultura, mladost, sport, muzika, sve je to produhovljeno ovih ljudi koji žive na ovim prostorima i koji žele da bude Vareš onakav kakav i jest. Kada bi se sanirala deponija na ulazu u Vareš, popravilo stanje infrastrukture i puteva, naša općina bi već procvjetala. Volim Vareš i zaista nemam namjeru da ga napustim uprkos prilikama koje su mi pružene, jer vjerujem da će biti života kao i prije.

Koliko ste upoznati sa projektom rudarenja na području lokaliteta Rupica i Veovače?

Informacije koje znam dobijem putem medija ili kroz posao u školi. Sretna sam što zapošljavate mnogo mlađih ljudi i što nas posjećuje veliki broj stranaca. Iako ne vidim da se nešto ubrzano radi, vjerujem da će Vaš projekat doprinijeti stanovništvu i lokalnoj zajednici.



Koji je Vaš stav o uvođenju novog smjera rudarske stručne škole i šta mislite da će značiti za budućnost školovanja?

Učenici su taj smjer prihvatali s radošću, osim što imaju kvalitetne profesore, predavače u vašoj kompaniji dodatni im je podsticaj stipendija. Smatram da je veoma bitan novi stručni kader koji predaje djeci, jer su ti profesori rudarski i mašinski inženjeri.

Od kojeg je značaja ovaj projekat za buduće generacije koje dolaze?

Značajan je u tolikoj mjeri što će se većina te djece odmah zaposliti. Međutim radit će samo sa trogodišnjom školom i trećim stepenom. Ne bi bilo loše da se uvede i četverogodišnje obrazovanje gdje bi učenici mogli nastaviti daljnje obrazovanje na tehničkim fakultetima i kako bi vi imali inženjere iz Vareša.

Da se malo vratimo u prošlost. Da li je netko od vaših bližnjih radio u rudniku ili željezari?

Moj otac je radio u livnici, u Željezari, završavao je finalne proizvode i lijevao nakon završene škole u Varešu.

Sjećate li se, da li se vodilo računa o okolišu u to vrijeme?

Ne bih znala kakva je situacija bila dok je otac radio. Ali zato od početka mog srednjoškolskog obrazovanja 1981. pa sve do ratnih dešavanja vodila se briga o okolišu i bilo je mnogo uređenije nego sada.

Za kraj našeg razgovora. Imate li neku poruku za mlade ljude?

Želim poručiti svim generacijama da počnu vjerovati prvenstveno u sebe, a onda u naš grad, da ostanu ovdje i pronađu svoje mjesto. Ono što je moj savjet jest ulaganje u svoje obrazovanje, jer bez nauke i knjige ne možete nigdje. Zato prestanite maštati o boljem životu na zapadu, nego se potrudite da imate bolji život u svojoj sredini.

Hvala Vam puno na Vašem izdvojenom vremenu.

Nema na čemu, hvala vama što ste mi dali prostora i priliku da kažem svoje mišljenje. Lijepo je vidjeti da se dešava pozitivna priča u našem gradu, sretna sam što zapošljavate, posebno mlade ljude koje sam ispratila iz srednje škole.